

平定粵寇紀略

一函  
十三冊

平定粵寇紀略卷十六

同治二年七月曾營湖口各軍攻毀文橋賊壘江西  
全境肅清

先是偽堵王黃文金糾合諸賊酋於二月由皖入  
江分擾鄱陽浮梁祁門都昌各縣屢爲浙江援軍  
與江西防軍所扼不得深入乃折而西竄湖口分  
爲三路上路由文橋中路由梧桐嶺下路由太平  
關而文橋賊勢最重黃文金親踞其中曾營浙江  
鹽運使李榕統帶鈞字全營自彭澤項家山一捷

後聞湖口告警於五月十四日至湖口之三里街  
前曾大臣以皖北廬州等處喫緊奏調改就武職  
新授貴州提督江忠義適自九江東渡來會紮堅  
山以逼之六月十七日賊自文橋撲犯堅山營盤  
江提督令各營直前迎敵李榕亦率隊至賊始卻  
退十九日賊以大股匿於酬山以小股誘戰江提  
督戒堅壁勿出賊計沮悉眾來攻我軍但以槍礮  
外擊忽見一酋指麾眾賊賊無反顧者江提督詢  
之降卒知爲黃文金聚槍一發應聲而仆賊眾爭

昇以行相率奔竄堅踞文橋不復再出二十八日  
敗另股賊於陳兵馬鎮二十九日復在花尖山毛  
家店鏖戰會浙江援軍按察使劉典及江西席寶  
田顧雲彩屈蟠各軍擊賊於南路青山橋斬馘二  
千有餘屈蟠復敗之於段家洲賊始有退志七月  
初三日夜江提督在堅山營中俯瞰文橋七壘火  
光熒熒若隱若現度將宵遁遂約李榕出隊會勦  
賊不虞我軍猝至惶懼無措各勇踰濠蟻附而升  
立將文橋七壘平毀日夜追勦直出建德所屬之



羅家畝積尸塞道時僞祐王率援賊數萬抄出官軍之後都司夏基鴻等斂衆血戰短兵相接以一堂百賊又大潰向建德遁去各營裏糧窮追殲斃無數江西境內一律肅清

上海軍攻毀太湖賊營直逼蘇城竝進攻江陰蹋平附城賊壘

上海官軍自攻毀沿湖賊卡後程學啟至吳江與李提督朝斌太湖水師會夾浦口督師船槍隊嚴陣而前盡下沿湖賊卡湖濱有大闕口賊憑湖設

立兩壘一卡堅守死拒以聯絡蘇嘉之賊七月初  
七日學啟率親軍礮隊當中路太湖水師四營分  
攻其東西歐陽利見截賊後先敗東山援賊學啟  
謂賊壘如鳥翼當先攻北岸遣敢死士五百越水  
夜襲之開礮環擊轟斃悍賊無數左有才等督軍  
奮勇先登歐陽利見等截扼飛虹橋口竝斬斷浮  
橋賊不得遁悉數殄滅斃賊首徐尙友一名南岸  
賊壘卽望風奔潰官軍乘勢追殺竝將洞庭東山  
立館各賊全行誅戮計斃二千餘人落水死者無

算學啟等遂督軍圍逼蘇州進屯跨塘鳳凰頸唐  
家濱水師進金雞湖獨池湖大牛橋陽城後湖與  
婁門葑門相距數里太湖水師亦泊南舍鎮時總  
兵劉銘傳將攻江陰統領李鶴章先遣七營至楊  
舍助之初七日敗賊於黃山及東門外斬首數百  
級生擒百餘名獲僞安福等數名賊於城外四門  
分壘踞守銘傳於十一日蹋毀北門賊壘十二日  
各營會攻東門將石壘三座次第攻克竝將賊眾  
歸路截斷四面兜殺生擒僞天將及僞燕侯等十

餘名斃賊千餘名擒斬賊酋二十餘名各軍滾營  
進紮逼城而陳

克復楓涇鎮竝浙江嘉善縣之西塘鎮

賊以大股拒守楓涇鎮李巡撫派令編修劉秉璋  
等各營進紮官塘七月十二日賊眾撲拒道員潘  
鼎新帶隊迎擊斃賊多名賊敗回巢我軍結營濠  
牆甫立賊復來撲勢甚兇猛鼎新令洋槍隊排擊  
燃礮猛轟各營分路包抄賊眾驚潰擒斬百餘名  
奪獲槍礮旂幟多件十三日秉璋等三路竝進賊



匿不出各營連放炸礮轟倒石壘數處忽浙江嘉善縣援賊大至楓涇賊突出數股迎拒游擊蔡渭川等開礮猛攻自辰至午木椿盡拔遂分隊繞過賊壘之西將援賊擊退副將楊鼎勳等帶各營由浮橋渡河繞至賊壘東北賊眾憑河抗拒官軍直撲東柵兩石壘賊施槍礮子密如霰鼎勳督勦愈急兵勇緣牆而上噴筒火箭齊施賊壘登時火起悍賊均焚死左旁壘賊奪門出竄斬馘數十名餘悉就擒街中踞賊膽落驚走各軍乘勢追殺復奪

石壘一座賊卡七處計焚溺殺死賊三四千人生擒五百餘名遂克楓涇鎮我勇亦傷亡百數十人是日都司曾守忠督礮船出楓涇西路亦將茜涇塘賊壘一座攻克自得楓涇後嘉興平湖乍浦各賊來援嘉善者約三四萬人分踞於干窰西塘等處綿亙二十餘里十八九日各營水陸齊集秉璋等由楓涇進西塘鎮太湖水師二營來會淮揚水師張元龍由蘆魁塘攻西柵楊寶勝朱開泰由楊匯攻北柵援賊分路迎拒另股由干窰出撲爲水

師擊退烏涇塘大路之賊蠡擁而來西塘鎮賊亦由南柵衝出鼎勳飭勇排放洋槍斃賊無數賊潛分兩翼從東西街口撲出鼎勳膝受槍傷裏創力戰官軍勇氣百倍賊隊漸搖動參將江福山先由馬鳴庵橫河衝入烏塘斷干窰之道副將熊殿元銜尾連進環施排礮復出隊登岸斷賊往來之路賊眾首尾不能相顧英國人馬格里以開花礮轟擊大隊悍賊斃十餘人鼎勳等督勇四面兜殺賊隊紛紛墜河生擒七百餘人內有洋人七名爲賊

領隊立時傷斃副將張元龍等分攻北柵西柵各  
斬馘數百人生擒數十人當將賊壘攻克西塘鎮  
亦埽盡餘賊竄併干窰二十一日復派游擊劉起  
帶隊進勦甫至中界賊眾出拒劉起首先衝入殺  
騎馬賊目一名各勇奮呼直前賊遂驚潰踢破石  
壘一座土壘兩座計斃賊二三百名生擒五十餘  
名餘賊遁入嘉善統計擒斬溺斃悍賊四五千  
人獲賊首僞王宗廖姓僞羅天安施得桂僞敬天  
福汪敬之僞鐙天侯曹盛勇訊明正法我軍傷亡



不及百人

八月上海軍克復江陰縣

江陰踞賊日久負嵎李巡撫飭總兵劉銘傳等帶  
兵進攻屢獲奇捷賊勢漸蹙七月十三日賊首陳  
坤書及潮武齊區五僞王糾眾十餘萬人由常州  
等處分道來援列隊數十里統領知州李鶴章自  
常熟至以洋槍隊敗之因賊眾我寡久恐難持立  
調副將張樹珊等自常熟福山馳往救援並調總  
兵郭松林等八營橫衝賊後勦破祝塘璜塘賊巢

乃出周莊與樹珊會且戰且進沿途擒斬四五千  
人直逼城邊鶴章銘傳周覽縣城四圍賊勢西自  
江邊東至山口沿途紮木城十餘座其中石壘土  
壘木卡大小百餘座守禦極堅因合水陸各營分  
路進攻豫爲部署七月二十九日五鼓松林樹珊  
等七營馬隊埋伏山後銘傳由中路進副將周盛  
波周盛傳循城出其右先擊東南大隊援賊又以  
四營出城西綴無錫援賊而黃翼升水師扼江干  
誘賊出敵自辰至巳賊隊森列層層抗拒松林忽

自山後翻上賊眾拚命血戰松林大呼殺入橫衝  
直突賊眾尾隊掣動頭隊遂亂銘傳樹珊揮眾直  
擣中堅賊遂大潰各軍追殺人馬自相踐蹋死者  
山積其附城踞守各賊見援賊敗走惶惑不定我  
軍乘勢促之將沿河木城土壘木卡百餘座全行  
掃蕩添調洋槍隊並帶炸礮乘勝轟擊先將石壘  
一座轟塌各勇越濠踰牆賊遂棄巢而走其餘各  
壘之賊悉被殲擒提督黃翼升又將極西山邊賊  
壘攻破於是城外各股援賊勦逐淨盡鶴章飭各

營四面困城七月三十八月初一等日官軍分投  
進攻礮力所及城垛望樓大半塌毀賊有內應者  
是夜三鼓兵勇緣梯而登隊伍相繼呼聲大震守  
賊下城巷戰我軍槍礮驟如風雨賊眾披靡偽廣  
王李愷順墮水死間有小路衝出之賊又被官軍  
擊回無得脫者當將江陰縣城克復  
上海軍攻克蘇州寶帶橋賊壘  
總兵程學啟進規蘇州營於外跨塘距婁門七里  
時附城賊壘十九礮遠不能及八月初四日學啟

至承安橋賊由婁葑齊三門出學啟以水陸三路  
當之既敗援賊遂營於永安橋壘有擒斬城東南  
寶帶橋爲太湖鎖鑰賊立石壘一土壘三防守甚  
固學啟與戈登謀先取之時官軍雖屢捷而賊壘  
堅密猝不得前因先期令陳東友成俞卿統礮船  
下黃天蕩李朝斌水師入寶帶橋與陸師會十一  
日僞忠王李秀成自金陵返蘇圖解城圍十六日  
水陸皆至宋有勝張行科襲其右陳忠德朱定元  
襲其左朝斌督水師八營入尹山橋爲中路洋將